

զիարեւոր գործս, և Յունաց քակել և բառնալ զմիջնորմն, և շինել զայն տախտակամած 'ի նշանադրեալ տեղին, որ և արարին իսկ, և որոշեցաւ սահման տեղւոյն Յովսէփայ Արեմաթացւոյն:

Այլ իբրեւ ձեռնարկին Հայք կախել զչար կանթեղս 'ի մէջ կամարին, յորոյ վերայ լեալ էր վէճն եւ որոշեալ, Յոյնք արդելին զնոսա, թէ կամարն այն մեզ շնորհեցաւ, և Հայք եւս խափանեցին զշինութիւն նոցին. և 'ի բազմանալ բանից սկսան հարկանել զիրեարս, և 'ի վերայ հասեալ այլազգեացն որոշեալ հանդարտեցուցին զնոսա: Իսկ հանդերձապետ Դատաւորին Յամանտի՝ չոքաւ առ Դատաւորն և ամբաստան եղեւ զՀայոց, թէ գան հարին զիս և զմանս 'ի Յունաց, ոչ հայեցեալ 'ի պատիւ տեառնդ իմոյ: Լուեալ Հայոց զաղմուկն զայն առաքեցին զմանս առ Դատաւորն և ծանուցին նմա թէ, Յոյնք դրժեալ խոստմանց իւրեանց յարուցին խռովութիւնս. և նա ասէ՝ ոմանք 'ի ձէնջ գան հարեալ են զհանդերձապետն իմ, սակայն արժանի է. զի ոչ եղաւ նա վերատեսուչ 'ի կողմանէ իմմէ և ոչ յազգէ իւրմէ. զի՞ փոյթ էր նմա մնալ անդ, իսկ նա կոծէր զանձն իւր թէ 'ի շնորհս տեառնդ իմոյ անպատիւ եղէ 'ի Հայոց, և Դատաւորն վարեաց զնոսա 'ի խաղաղութիւն. թէպէտեւ Հայք ունէին իրաւունս գանկատելոյ, զի գտաւ 'ի ձեռս Յունաց ուրազ և այլ գործի շինուածոյ, որոյ վասն ազգ արարին Քաղաքապետին. զի և Յոյնք յառաջագոյն ամբաստան լեալ էին նմա: Իսկ նորա սաստկացուցեալ զբան իւր յանդիմանէր զՀայս իբրեւ յանցաւորս 'ի գրդռելոյ գանձապետին իւրոյ, եւ յասել Հայոց թէ յանցաւոր Յոյնք են. ասէ՝ գան հարեալ էք զհանդերձապետ Դատաւորին, և նա բողբէ զձէնջ. թէպէտ յորդորեցի զնա 'ի խաղաղութիւն, այլ Դատաւորն ոչ լռէ, մանաւանդ 'ի կռուիլն ձեր եթէ լուեալ էին զօրաց և քաղաքացւոց, խռժէին 'ի ներքս յաւար և յափշտակութիւն, և ես լինէի յանցաւոր առաջի կուսակալին: Հայք ասեն՝ զայդ ամենայն խօսեցաք Դատաւորին, և նա դատապարտեաց զայրն, զի չէր օրէն գնալ նորա անդ: Քաղաքապետն ասէ՝ զայս և զայն ոչ գիտեմ, այլ իբրեւ լուայ ըզչփոթն, ետու փակել զլուռն տաճարին, եղեալ 'ի նմա